



PRIMEIRO
MINISTRO

VI Governo Constitucional

Gabinete do
Primeiro-Ministro

Mensajem S.E Primeiru-Ministru Ba Loron Direitus Labarik 20 Novembru

Ohin, loron ruanulu fulan Novembru mundu tomak selebra loron Direitu Labarik sira nian.

Iha Timor-Leste ita selebra loron ida ne'e ho tema **"HAMUTUK ITA KOMBATE TRÁFIKU NO TRABALHO INFANTIL"**.

Ida ne'e signifika, ita hotu-hotu no ita ida-idak, tenki haka'as-a'an liu-tan, atu kontribui hodi responde ba realidade iha ita nia rain, ne'ebé hatudu katak, sei iha labarik barak ne'ebé sai objetu tranzasaun entre ema bo'ot sira, no sei iha labarik barak maka tenki hala'o serbisu hanesan kuru-bé, hili-ai, serbisu iha to'os no natar, hein karau, hein bibi, fa'an-sasan iha merkadu, no seluk-seluk tan, serbisu hirak ne'ebé tuir lolo'os sai nu'udar ema bo'ot ninia kna'ar no responsabilidade.

Iha loron mundial Direitu Labarik nian ida ne'e, mai ita hotu asumi ita nia kna'ar no responsabilidade nu'udar ema adultu, hodi hamosu kondisaun, fo'o apoiu, no enkoraja labarik sira ho sira ida-idak ninia familia, atu husik sira ba eskola, halimar tuir sira nia idade, no husu atu ajuda iha serbisu uma-laran nian, tuir sira nia idade permiti, hodi nune'e bele prepara didi'ak sira ba loron aban-bain-rua, tamba sira maka fator determinante iha sustentabilidade, ka sira maka sei hatutan moris iha familia, sosiedade no Nasaun Timor-Leste.

Parabéns ba labarik Timor Oan hotu, ba loron mundial ne'ebé selebra imi nia Direitu atu moris nu'udar labarik, iha familia, sosiedade no Nasaun nia laran.

Mai ita hotu respeita Labarik sira nia Direitu.

Ida ba hotu! Hotu-hotu ba Ida!